

ԱՉԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԲՈՒԷՅՈՒ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ը. Տարի, Թիւ 344, Ուրբաթ, 29 ՅՈՒՆԻՍ, 2016

ՀԱՅԿԱԿԱՆ

Անորոշութիւնը Կը Մնայ Տիրական՝ Պարեկապահակային Ծառայութեան Գունդի Տարածքի Գրաւման Հարցով

Հաւաքը Փոխադրուեցաւ Ազատութեան Հրապարակ



Պարեկապահակային ծառայութեան գունդի տարածքին գրաւումը ոստիկանական շէնքին կից՝ Խորենացի փողոցին մօտ 27 Յուլիսին հաւաքուած քաղաքացիները մէկ առ մէկ բերման ենթարկուեցան ոստիկանութեան կողմէ, սակայն անոնք աւելի ուշ ազատ արձակուեցան: Բերման ենթարկուածներու շարքին էին Ալէք Ենիգովճեան, Դաւիթ Սանասարեան եւ Լեւոն Բարսեղեան:

Բերման ենթարկուելէ առաջ Ալէք Ենիգովճեան փոխանցած է Համակարգող

խորհուրդին որոշումը Խորենացիի փողոցէն հաւաքը Ազատութեան հրապարակ փոխադրելու: Պարոյր Հայրիկեան ոստիկաններուն փոխանցած է, որ իրենք հաւաքը այլ վայր պիտի տեղափոխեն՝ յորդորելով ոստիկանները ազատ արձակել բերման ենթարկուածները, որպէսզի անոնք կարենան հաւաքին մասնակցիլ: Չորեքշաբթի օր ուշ երեկոյեան մեծաթիւ ցուցարարներ դարձեալ երթ կատարեցին Երեւանի կեդրոնական փողոցներուն մէջ:

Ըստ Մարդու Իրաւունքներու Պաշտպանի Աշխատակազմին.

Անթոյլատրելի է Առանց Պատշաճ Բացատրութեան Քաղաքացիները Բերման ենթարկել

Հայաստանի մարդու իրաւունքներու պաշտպանի աշխատակազմը անթոյլատրելի նկատած է առանց պատշաճ բացատրութեան եւ պատճառներու քաղաքացիները բերման ենթարկելը: Այս մասին յայտնած են Հայաստանի մարդու իրաւունքներու պաշտպանի աշխատակազմի գրասենեակէն:

Գրասենեակէն յիշեցուցած են, որ, Հայաստանի սահմանադրութեան համաձայն, անձնական ազատութենէն զրկուած իւրաքանչիւր անձ իրեն հասկնալի լեզուով անյապաղ պետք է տեղեկ ըլլայ իր բերման ենթարկուելու պատճառներուն մասին:

«Սահմանադրութեան այս սկզբունքը կը գործէ անմիջականօրէն եւ ենթակայ է անվերապահ կատարման: Կը տեղեկացնենք, որ ստացուած հաղորդումներու եւ լրատուութեան միջոցներու հրապարակումներու հիման վրայ Մարդու իրաւունքներու պաշտպանի աշխատակազմի այցելութիւններ կը կատարուին հաւաքի վայր եւ ոստիկանութեան համապատասխան ստորաբաժանումներ: Պաշտպանի աշխատակազմը կը շարունակէ աշխատիլ շուրջօրեայ դրութեամբ եւ ներուժի ամբողջ ծաւալով», նշուած է յայտարարութեան մէջ:

Նիկոլ Փաշինեան Նախաձեռնած Է Ստորագրահաւաքի՝ Ազգային Ժողովի Արտակարգ Նիստ Գումարելու Համար

Պարեկապահակային ծառայութեան գունդի տարածք մուտք գործած զինեալներուն եւ տեղի ունեցող դէպքերուն առնչութեամբ քննարկում կատարելու նպատակով Ազգային ժողովի պատգամաւոր Նիկոլ Փաշինեան առաջարկած է արտակարգ նիստ գումարել:

Լրագրողներուն հետ ունեցած զրոյցին ընթացքին ան յայտնած է, որ նախաձեռնած է ստորագրահաւաքի, անհրաժեշտ է առնուազն 44 պատգամաւորի ստորագրութիւն՝ նիստ գումարելու համար: Ըստ անոր, ցարդ ստորագրած են ինք ու «Ժառանգութիւն» կուսակցութեան խմբակցութեան պատգամաւոր Թեւան Պօղոսեան, իսկ անկախ պատգամաւոր Ալեքսան Արզումանեան միանալու փափաք յայտնած է: Ան կ'առաջարկէ արտակարգ նիստը գումարել 28 Յուլիսին՝ ժամը 17:00-ին:

Ազգային ժողովի հասարակութեան եւ տեղեկատուութեան միջոցներու հետ կապերու վարչութեան պետ Արսէն Բաբայեան յայտնած է, որ, ըստ Կանոնակարգ օրէնքին, արտակարգ նիստի կարելի է հրաւիրել, եթէ անոր նախաձեռնած է նախագահը, կառավարութիւնը կամ Ազգային ժողովի պատգամաւորներուն մէկ երրորդը:

«Սասնայ Ճոեր»-ը Պալիկը Տարած Է Յանձնելու Վերաւոր Տղան, Կրակած Են»

Պալիկ Մանուկեանի դուստրը՝ Ասպրամ Մանուկեան դիմատետրի իր էջին վրայ հրապարակած է մանրամասնութիւններ 26 Յուլիսի գիշերը իր հօր եւ եղբօր հետ տեղի ունեցած դէպքին մասին:

Ան գրած է, որ «Սասնայ Ճոեր»-ուն հետ կապ հաստատուած է: Արմենակ Կիրեղեանը՝ Կիրեղեան եղբայրներուն հայրը, 26 Յուլիսի դէպքերուն մասին յայտնած է, որ ոստիկանութեան կողմէ գրոհ չէ եղած: Ան նշած է, որ ուշ երեկոյեան Պալիկ Մանուկեան փորձած է բանակցիլ ոստիկաններուն հետ, որպէսզի իրենց տրամադրեն բժիշկ կամ վիրաւորը տանին բուժելու: «Այդ պահուն ծանր գնդացրային զինատեսակէ կրակ բացուած է Պալիկ Մանուկեանի վրայ: Որդին տեսնելով այդ մէկը վազած է օգնութեան եւ անոր վրայ եւս կրակ բացուած է: Յետոյ «Սասնայ Ճոեր»-ու անդամներէն մէկն ալ վազած է օգնութեան, անոր նոյնպէս վիրաւորած են», ըսած է Ա. Կիրեղեան:

«Իրականութիւնը հետեւեալն է. պայմանաւորուածութիւն ձեռք բերուած է ոստիկանութեան յանձնելու վիրաւոր ապստամբը: Յանձնելու գացած է Պալիկը: Ոստիկանութիւնը կրակ բացած է, անոր վիրաւորած են: Արամը՝ Պալիկի տղան, վազած է դէպի հայրը, անոր ալ վիրաւորած են: Երկու միւս տղաքը՝ Գագիկն ու, կարծես, Արամը, պատգարակներ հանած են՝ վիրաւոր ընկերներուն տանելու: Զանոնք ձերբակալած են», գրած է Ասպրամ Մանուկեան:

Միւս կողմէ, լրագրողներուն հետ ունեցած գրոյցին ընթացքին Պաւել եւ Արամ Մանուկեաններու պաշտպան Ինեսսա Պետրոսեան յայտնած է, որ Պաւել Մանուկեանին ու իր որդիին՝ Արամ Մանուկեանին մեղադրանք առաջադրուած է Քրեական օրէնսգիրքի 219-րդ յօդուածի 3-րդ մասով (շէնքեր, շինութիւններ, փոխադրամիջոց, հաղորդակցութեան կամ կապի միջոցներ գաւթել) եւ 235-րդ յօդուածով (ապօրինի կերպով զէնք, զինամթերք, պայթուցիկ նիւթեր կամ պայթուցիկ սարքեր ձեռք բերել, օգտագործել, պահել, փոխադրել կամ կրել):

Անոր համաձայն, Պաւլիկ Մանուկեանը, հակառակ իր առողջական ծանր վիճակին, փափաք յայտնած է ներկայ ըլլալ դատարանին մէջ, իսկ Արամը՝ ոչ:

Ազգային Անվտանգութեան Ծառայութիւնը 3 Պահանջ Ներկայացուցած է «Սասնայ Օճեր» Խումբին

26 Յուլիսին պարեկապահական գունդի տարածքին մէջ տեղի ունեցած դէպքերուն լոյսին տակ Ազգային անվտանգութեան ծառայութիւնը հրապարակած է հաղորդագրութիւն մը, որուն մէջ նշած է, որ ծառայութիւնը թէ՛ բանաւոր, եւ թէ՛ գրաւոր ձեւով բազմիցս պաշտօնապէս նախազգուշացուցած էր Հայաստանի ոստիկանութեան պարեկապահակային ծառայութեան գունդի տարածքը բռնագաւթած խումբը՝ անյապաղ դադրեցնելու շարունակուող յանցաւոր գործողութիւնները, մասնաւորաբար՝ չկրակելու, ինչպէս նաեւ զինուած դուրս չգալու տուեալ տարածքէն:

Ազգային անվտանգութեան ծառայութեան համաձայն, հակառակ այս բոլորին, խումբի կարգ մը անդամներ անտեսած են նշուած պահանջը եւ, առանց յանձնուելու մտադրութեան կամ այլ հիմնաւոր անհրաժեշտութեան, զինուած դուրս եկած են պարեկապահակային ծառայութեան գունդի տարածքէն, եւ, ի պատասխան, զանոնք վնասագերծելու նպատակով ձեռնարկուած են իրավիճակէն թելադրուող գործողութիւններու: «Սկսած յատուկ միջոցառման ընթացքին խումբի որոշ անդամներ իրաւապահներուն ուղղութեամբ արձակած են համատարած կրակոցներ, որուն հետեւանքով վիրաւորուած է իրաւապահ մարմինի ծառայող: Ձեռնարկուած համարժէք գործողութիւններու արդիւնքով վնասագերծուած է խումբի չորս անդամ, որոնցմէ երկուքը վիրաւորուած են, իսկ միւս երկուքը ստիպուած եղած են յանձնուիլ», նշած է ծառայութիւնը:

Ազգային անվտանգութեան ծառայութիւնը յայտնած է նաեւ, որ վերոյիշեալ տարածքի գրաւման առիթով յարուցուած քրեական գործի ծիրին մէջ դատավարական եւ հետախուզական եղանակով ձեռք բերուած են հաւաստի տուեալներ (նաեւ՝ օրէնքով սահմանուած կարգով ստացուած ձայնագրութիւններ), ըստ որոնց, 17 Յուլիսէն ի վեր խումբի կարգ մը անդամներ պարեկապահակային գունդի տարածքին մէջ կը պահուին իրենց կամքին հակառակ:

Հաղորդագրութեան մէջ նաեւ նշուած է. «Ազգային անվտանգութեան ծառայութիւնը կը փաստէ, որ խումբի աւելի աշխուժ անդամներու ընդգծուած ահաբեկչական գործողութիւնները ներկայ պահուն կը սպառնան ոչ միայն պատանդներուն, այլեւ խումբի միւս անդամներուն, յատկապէս, վիրաւորներուն կեանքին: Ստեղծուած նոր իրավիճակին լոյսին տակ առկայ է նշուած անձերուն կեանքը պաշտպանելու բացարձակ անհրաժեշտութիւն, ինչ որ կը ստիպէ իրաւապահ մարմիններուն դիմել ահաբեկչական գործողութիւնները կանխող եւ խափանող անհրաժեշտ եւ համաչափ միջոցներու»:

Առ այդ, Հայաստանի Ազգային անվտանգութեան ծառայութիւնը զինուած խումբի անդամներէն վճռականօրէն պահանջած է.

«1. անյապաղ վերացնել վիրաւորներուն որակեալ բուժօգնութիւն տրամադրելու բոլոր խոչընդոտները,

անմիջապէս ազատ արձակել բոլոր պատանդները,

վար դնել զէնքը եւ յանձնուիլ իշխանութիւններուն:

Կարելիութիւն դեռ կայ, բայց ժամանակը կը սպառի»:

Չինեալ Խումբի Անդամներուն Կողմէ Բժիշկներն Ու Հիւանդապահները Պատանդ Պահելը Ադմուկ Բարձրացուց

Ոստիկանութիւնը 26 Յուլիսի գիշերը հրապարակեց հաղորդագրութիւն մը՝ տեղեկացնելով, որ պարեկապահակային ծառայութեան գունդի տարածքին մէջ գտնուող զինուած խումբի անդամները պատանդ վերցուցած են երկու զինեալ վիրաւորներ բուժելու նպատակով տուեալ տարածք մուտք գործած բժիշկներն ու հիւանդապահները՝ Նորայր Թեւանեանը, Մալվատոր Խէչոյեանը, Դաւիթ Տօնոյեանը եւ Մալինա Մարգարեանը: Հայաստանի առողջապահութեան նախարարութիւնը յայտնեց, որ 27 Յուլիսի երեկոյեան ազատ արձակուած է Դաւիթ Տօնոյեան:

Աւելի ուշ Հայաստանի առողջապահութեան նախարար Արմէն Մուրադեան փորձած է մտնել Հայաստանի ոստիկանութեան պարեկապահակային ծառայութեան գունդի տարածք՝ նպատակ ունենալով քննարկել գունդի տարածքին մէջ վիրաւորներուն բժշկական խնամքի կազմակերպման եւ պատանդ բժիշկներու ազատ արձակման հարցը: Մակայն, ըստ առողջապահութեան նախարարութեան, իրաւապահները չեն արտօնած, որ նախարարը տարածք մտնէ:

«Շտապ օգնութիւն» ընկերութեան տնօրէն Թագուհի Ստեփանեան իր կարգին տեղեկացուցած է, որ խումբին մէջ կան անձեր, որոնք հրազենային հարուածի ենթարկուած են: «Շտապ օգնութեան» բժիշկները առաջարկած են ոստիկանութեան պարեկապահակային ծառայութեան գունդը գրաւած զինուած խումբի վիրաւոր անդամները տեղափոխել հիւանդանոց, սակայն անոնք մերժած են», ըսած է Թ. Ստեփանեան՝ դատապարտելի նկատելով նման գործելաձև, որ հարցը ոչ մէկ ձեւով կը լուծէ:

Բժիշկները պատանդ պահելու արարքը դատապարտելի նկատած են նաեւ Հայաստանի տարբեր հիւանդանոցներու բժիշկները՝ կոչ ուղղելով անյապաղ ազատ արձակել իրենց պաշտօնակիցները:

Բժիշկները այս առիթով իրենց արտասանած խօսքին մէջ ընդգծած են, որ բոլոր մասնագիտութիւններէն ամէնէն մարդասիրականը բժիշկ ըլլալն է, առաջնորդուիլ այն սկզբունքով, որ ուրիշին առողջութեան համար պէտք է զոհես քու առողջութիւնդ, երբեմն նոյնիսկ կեանքդ: Մակայն անընդունելի է, որ օգնութեան ձեռք մեկնած ու պատրաստակամութիւն յայտնած բժիշկները իրենք պատանդի վերածուին: Բժիշկները այդ արարքը խիստ դատապարտելի նկատած են՝ նշելով, որ անիկա ոչ մէկ ձեւով արդարացի է: «Նման գործելաձև մեր ազգին պատիւ չի բերեր, հայերը միշտ օգնած են զիրար, կարգ մը պարագաներու նոյնիսկ թշնամիին, սակայն մենք այլ մօտեցում կը կիրարկենք: Բոլորս պէտք է այնպէս ընենք, որ շատ շուտով մեր գործընկերները ազատ արձակուին: Բժիշկները միշտ առաջին շարքին եղած են, անձնուրաց աշխատած են: Բժիշկները արժանի չեն նման վերաբերմունքի», ըսած է բժիշկ Գագիկ Բեգլարեան:

Բժիշկ Դալիթ Պետրոսեան նոյնպէս դատապարտելի նկատած է նման գործելաճառ մը՝ յիշեցնելով, որ լարուած իրավիճակ է, 22 տարի դանդաղ պատերազմ կ'ընթանայ, ուստի շատ արագ կերպով իրավիճակը կրնայ թեժանալ: Ան կոչ ուղղած է զինեալ տղոց՝ իրենց դէմքը փրկելու համար ազատ արձակելու բժիշկները:

Բժշկական հանրութիւնը եւս դատապարտեց բժիշկները եւ հիւանդապահները պատանդ պահելու երեւոյթը: Անոնք այս առիթով հրապարակած են կոչ մը, որուն մէջ կը նշուի. «Ամբողջ աշխարհին մէջ անընդունելի, դատապարտելի երեւոյթ է, երբ փորձ կը կատարուի ձեռք բարձրացնել մարդասիրական առաքելութիւն իրականացնող մասնագէտներու նկատմամբ: Տեղեկութիւնը մեծ վրդովմունքով ընդունած Հայաստանի բժշկական ամբողջ հանրութիւնը խստօրէն կը դատապարտէ անբարոյ այս քայլը եւ կը պահանջէ շտապ ազատ արձակել պատանդառութեան մէջ գտնուող բուժաշխատողները՝ առանց որեւէ նախապայմանի: Անգամ հաշուի չ'առնուիր այն հանգամանքը, որ դէպքերուն սկիզբէն մինչեւ օրս այս բժիշկները անհրաժեշտ բուժօգնութիւն ցուցաբերած են նաեւ զինեալ խումբի անդամներուն»:

Չանգուածային Անկարգութիւններուն Մասնակցելու Յանցանքով Մեղադրանք Առաջադրուած Է 12 Անձի

Հայաստանի քննչական կոմիտէի Յատուկ քննչական ծառայութեան գլխաւոր վարչութիւնը կը շարունակէ 20 Յուլիսին տեղի ունեցած Չանգուածային անկարգութիւններու դէպքերուն առիթով յարուցուած քրեական գործի նախաքննութիւնը:

Ձեռնարկուած քննչական գործողութիւններուն շնորհիւ կարելի եղած է ձեռք բերել ապացոյցներ, որոնց համաձայն, մեղադրանք կարելի է առաջադրել 5 այլ անձերու եւս՝ Հայաստանի քրեական օրէնսգիրքի 225-րդ յօդուածի 2-րդ մասով՝ Չանգուածային անկարգութիւններուն մասնակցիլ, գոյք ոչնչացնել, իշխանութեան ներկայացուցիչ հանդիսացող ոստիկանութեան աշխատակիցներուն նկատմամբ բռնութիւն գործադրել: Քննիչը որոշում տուած է անոնց նկատմամբ իբրեւ խափանման միջոց կալանաւորումը որդեգրել:

Այս առնչութեամբ հրապարակուած հաղորդագրութեան մէջ նաեւ նշուած է. «Նախնական քննութեան տուեալներով՝ անկարգութիւններու հետեւանքով տարբեր մարմնական վնասուածքներով բժշկական օգնութիւն ստանալու համար բժշկական հաստատութիւն դիմած է 62 անձ, որոնցմէ 37-ը՝ ոստիկան, 25-ը՝ քաղաքացիական անձ: Այսպիսով՝ 27 Յուլիսի դրութեամբ, տեղի ունեցած Չանգուածային անկարգութիւններուն մասնակցելու համար մեղադրանք առաջադրուած է ընդհանուր թիւով 12 անձի: Նախաքննութեան արդիւնքներով կայացուող դատավարական որոշումներուն մասին կը տեղեկացնենք պարբերաբար»:

Զինուած Խումբի Անդամները Պատգամաւորներուն Հետ Հանդիպելու Ակնկալութիւն Ունին

Հայաստանի ոստիկանութեան պարեկապահակային ծառայութեան գունդի տարածքին մէջ գտնուող զինուած անձերուն մէջ կայ երկու վիրաւոր: Լրագրողներուն հետ ունեցած զրոյցին ընթացքին այս մասին յայտնած է Հիմնադիր խորհրդարանի անդամ Ալեք Ենիգոմշեան: «Ուրիշ վիրաւորներ չկան, մէկ վիրաւորը նախկինէն մնացած է, միւսը նոր է, ունի թեթեւ վնասուածք: Ներսը գտնուող տղաքը կը տիրապետեն իրավիճակին», ըսած է Ալեք Ենիգոմշեան: Ան փոխանցած է պարեկապահակային գունդի տարածքին մէջ գտնուողներուն ակնկալութիւնները:

Առաջինը կը վերաբերի հոն գտնուող բժշկական խումբին կողմէ հերթափոխութեամբ աշխատանք տանելուն:

Ան շեշտած է, որ երկրորդը կը վերաբերի Ազգային ժողովի պատգամաւորներուն. արդարեւ, զինեալները կ'ակնկալեն, որ պատգամաւորները դիմեն ուժային կառոյցներուն եւ երթան ու հանդիպում ունենան զինեալներուն հետ:

«Մինսքի Խմբակի Համանախագահները Հայաստանի Եւ Ազրպէյճանի Նախագահներուն Հաւանական Հանդիպումէն Յառաջընթացի Ակնկալիք Ունին» Կ'ըսէ Ուորլիք

ԵԱՀԿ-ի Մինսքի Խմբակի ամերիկացի համանախագահ Ճէյմս Ուորլիք «ՌԻԱ Նովոսթի»-ի հետ զրոյցի մը ընթացքին յայտարարած է, որ ԵԱՀԿ-ի Մինսքի Խմբակի համանախագահները կ'ակնկալեն, որ Հայաստանի եւ Ազրպէյճանի նախագահներուն հաւանական հանդիպումի ընթացքին Լեռնային Ղարաբաղի տագնապի լուծման հոլովոյթին մէջ յառաջընթաց պիտի արձանագրուի:

«Վիեննայի եւ Փեթերսպուրկի հանդիպումները դեր խաղացած են յարաբերական կայունութեան եւ շփման գիծին ու հայ-ազրպէյճանական սահմանին վրայ լարուածութեան նուազեցման հարցին մէջ: Նախագահներու ակնկալուող հանդիպումը ցոյց պէտք է տայ կողմերու պատրաստակամութիւնը՝ հրադարարի դրութիւնը պահպանելու հարցին մէջ: Մենք նաեւ կ'ակնկալենք, որ յաջորդ հանդիպումը պիտի նպաստէ բանակցային հոլովոյթին մէջ յառաջընթաց ապահովելուն, ինչպէս նաեւ պիտի արտօնէ շարունակել կողմերուն միջեւ լարուածութեան թուլացման ուղղուած աշխատանքները: Կ'ակնկալենք, որ կողմերը հաւատարիմ մնան զինադուլի դրութեան պահպանման ուղղութեամբ նախագահներու կողմէ արտայայտուած պատրաստակամութեան», ըսած է Ուորլիք:

337 Երեսփոխաններ Եգիպտոսի Խորհրդարանին Ներկայացուցին Հայոց Գեղասպանութիւնը Ճանչցող Բանաձեւ Մը

Եգիպտական «Պալատ» օրաթերթին կայքը կը հաղորդէ, որ Եգիպտոսի խորհրդարանի մշակոյթի եւ տեղեկատուութեան յանձնախումբի անդամ Մուսթաֆա Պաքրի խորհրդարանին ներկայացուցած է իր եւ 336 այլ երեսփոխաններու կողմէ ստորագրուած բանաձեւ մը, որ խորհրդարանէն կը պահանջէ ճանչնալ Հայոց ցեղասպանութիւնը, ինչպէս նաեւ ՄԱԿ-ի եւ այլ պետութեանց կոչ կ'ուղղէ իրաւական անհրաժեշտ միջոցառումները որդեգրելու՝ միջազգային ընտանիքին կողմէ ցեղասպանութեան ճանաչման համար:



Պաքրի իր դիմումին մէջ կ'աւելցնէ, որ պէտք է դատապարտել օսմանցիներուն կողմէ 1915-1922-ին գործուած ջարդերը, որոնց զոհ գացին 1,5 միլիոն անմեղ քաղաքայիններ, որովհետեւ այդ ոճիրը անզէն ժողովուրդի մը դէմ ցեղասպանութիւն է:

ՄԻՋԱԶԳԱՅԻՆ

Գամիշլիի Մէջ Մեծ Պայթում

Թուրքիոյ սահմանակից Գամիշլի քաղաքին մէջ գտնուող քրտական ուժերու կեդրոնին դէմ ականուած բռնակառքով անձնասպանական գործողութիւն մը պատճառեց 44 զոհ եւ 140 վիրաւոր:

Ըստ «Նաշրա» կայքին, Գամիշլիի Ղարալիյէ թաղամասին մէջ տեղի ունեցած են երկու իրերայաջորդ անձնասպանական գործողութիւններ, առաջինը՝ ականուած ինքնաշարժով, իսկ երկրորդը՝ ականուած մոթոքսիքլէթով:

SUZET ստանձնեց գործողութեան պատասխանատուութիւնը՝ յայտնելով, որ գործողութիւնը կատարուած է ականուած բռնակառքով, իսկ զոհերուն թիւը 100 է:

Քլինթըն՝ Միացեալ Նահանգներու Նախագահութեան Առաջին Կին Թեկնածուն



Միացեալ Նահանգներու արտաքին գործոց նախկին նախարար, նախկին առաջին տիկին Հիլըրի Քլինթըն պաշտօնապէս դարձաւ Միացեալ Նահանգներու նախագահութեան Դեմոկրատական կուսակցութեան թեկնածուն:

Ֆիլատելֆիոյ մէջ Դեմոկրատական կուսակցութեան ընդհանուր ժողովի ընթացքին Սաութ Տաքոթա նահանգի պատուիրակներուն 15 ձայները

ապահովելով՝ անոր քուէներուն թիւը բարձրացաւ 2383-ի: Նշենք, որ ընդհանուր ժողովին մասնակցող պատուիրակներուն թիւը հինգ հազար էր:

Քլինթըն այսպիսով դարձաւ առաջին կինը, որ իբրեւ նախագահութեան թեկնածու կ'առաջադրուի: Ան փոխնախագահի պաշտօնին առաջադրած է Վըրճինիա նահանգէն ծերակուտական Թիմ Քէյնը:

Քլինթըն թեկնածութիւնը ապահովելէ ետք կիներուն համար պատմական փուլի մը սկիզբը յայտարարեց:

Անոր դեմոկրատական մրցակից ծերակուտական Պըռնի Սանտըրզի կողմնակիցները հեռացան ժողովէն՝ ի նշան բողոքի Հիլըրի Քլինթընը իբրեւ միակ թեկնածու հաստատելու քայլին:

Սանտըրզի կողմնակից պատգամաւորներու զգալի մասը դահլիճէն դուրս եկած է իր ղեկավարէն անմիջապէս ետք, որ հեռացած է ընդհանուր ժողովէն, սակայն անկէ առաջ պաշտօնապէս յայտարարած, որ ինք կը պաշտպանէ Քլինթընը:

Այնուհետեւ քանի մը տասնեակ պատգամաւորներ ժողովի վայրին մօտ գտնուող մամուլի կեդրոն եկած են պաստառներով, որոնք կը դիմակազերծեն Դեմոկրատական կուսակցութեան Ազգային կոմիտէն: «Ասիկա այն է, թէ ինչ տեսք ունի ժողովրդավարութիւնը», վանկարկած են անոնք:

ԱՆՂՐԱՂԱՐ

Փուլին – Էրտողան Հանդիպում. Պարտադրուած Մերձեցում



9 օգոստոսին Փեթերսպուրկի մէջ տեղի կ'ունենայ Փուլին- Էրտողան հանդիպումը: Այս հանդիպումը սպասելի էր գրեթէ մէկ տարի տեւած խզումը ընդհատումէ ետք:

Ռուսական զինուորական օդանաւի հարուածէն ետք ստեղծուած լարուած իրավիճակի պարունակին մէջ արձանագրուող պարանաձգութեան խաղը աւարտած է: Նախ՝ օդանաւը իմանալով, թէ՞ չիմանալով խփուած

է, յետոյ Թուրքիոյ օդային սահմանը հատած է, թէ՞ չէ հատած, ապա Էրտողանը ցաւակցութիւն, թէ՞ ներողութիւն ըսած է, գրաւոր փոխանցած է, թէ՞ կիսապաշտօնական եւ այլն: Մինչ այդ նաեւ չմոռնանք, որ պարանաձգութեան այս խաղի ընթացքին պաշտօնական Մոսկուան շատ պաղ, եթէ ոչ հեզնական վերաբերում ունեցած էր Ռուսիոյ ազգային տօնին առիթով Թուրքիոյ կողմէ իրեն ուղղուած շնորհատրագիրին առիթով:

Հիմա այդ բոլորի փուլը երեւութապէս աւարտած է եւ հետեւողներուն մօտ այն տպաւորութիւնն է, որ պահանջուածը ներողութիւնն էր, որ պէտք է ըսէր Էրտողանը, որուն դիմաց երկու երկիրներուն յարաբերութիւնները պիտի վերաբնականոնացուէին:

Խորքին մէջ սակայն թատերական այս ներկայացումներուն ետին, Մոսկուան եւ Անգարան յայտնուած են Արեւմուտքի կողմէ միեւնոյն վերաբերմունքին արժանանալու դիրքերուն վրայ: Փոխադարձ, յատկապէս տնտեսական շահերը կը մերձեցնեն երկու երկիրները: Ռուսիոյ տնտեսական պատժամիջոցները իրօք վնասած են Թուրքիոյ, որ այլապէս մեծ մարտահրաւերներ դիմակայելու ընթացքին մէջ է:



Թուրքիոյ մէջ չկայացած յեղաշրջումը Էրտողանի դէպի Ռուսիա կատարած շրջադարձէն ետք էր: Թէեւ պետական զինուորական հարուածի պատճառներուն յայտարարութիւններուն մէջ այս հանգամանքը չէր նշուած, բայց չի բացառուիր, որ անիկա կրնար լուր ազդեցութիւն ունեցած ըլլալ: Մանաւանդ որ Էրտողանը անընդհատ կը մեղադրէ Արեւմուտքն ու Ուաշինկթընը յեղաշրջումի Միացեալ Նահանգներէն հեռակառավարուած ըլլալու վարկածը առաջ քշելով:

Տակաւին պարզ չէ, որ սուրիական պատերազմին առումով երկու երկիրները ի՛նչ համատեղ դերակատարութեան մասին կրնան համաձայնիլ՝ նկատի ունենալով տրամագծօրէն

հակոտնեայ իրենց դիրքորոշումները այս հարցին մէջ: Ասիկա աւելի պարզ կը դառնայ քրտական գործօնին նկատմամբ երկու երկիրներու գործնական դիրքորոշումները դիտարկելու ընթացքին:

Հայկական հարցերու վերաբերեալ թրքական մամուլին մէջ երեւցան այն կանխատեսումնային վերլուծումները, որոնց համաձայն, յեղաշրջումի փորձին նախորդած ժամանակահատուածին Անգարան կը պատրաստուէր Երեւանի հետ իր յարաբերութիւններու բնականոնացման գործընթաց սկսելու:

Թուրքիոյ արտաքին գործոց նախարար Չաուշօղլուն Պաքու այցելութենէն ետք յայտարարած էր, որ նախադրեալներ ստեղծուած են Արցախեան խնդիրի լուծման համար: Միաժամանակ թէ՛ ան եւ թէ՛ այլ բարձրաստիճան թուրք պաշտօնեաներ տարբեր առիթներով հաստատած են, որ Թուրքիան խնդիրի լուծման հարցին մէջ ամբողջովին կը պաշտպանէ Ազրպէյճանի մօտեցումը: Գաղտնիք չէ, որ Ազրպէյճանն ալ փոխզիջում ըսուածը կը հասկնայ միայն իբրեւ հայկական կողմի միակողմանի եւ ամբողջական զիջում: Ուրեմն այս պարագային ինչպէ՞ս կը համադրուին Ազրպէյճանի եւ Թուրքիոյ կողմէ Հայաստանի շրջափակումը վերացնելու ռուս-թրքական կանխատեսումները:



Կարելի չէ չիշել այստեղ «Իզվեսթիա»-ի յօդուածը, որ Ռուսիան կը նախապատրաստուի աջակցելու Հայաստանի Հանրապետութեան երկկողմանի ապաշրջափակման: Այս մէկը կը խօսի նաեւ արցախեան հիմնահարցին մէջ ռուսական լուծման ծրագիրի մասին, որ այժմ քաղաքագիտական վերլուծութիւններով հանդէս կու գայ իբրեւ այժմեականացած քազանեան նախագիծ անունով: Վերլուծման համար գուցէ նաեւ օգտակար ըլլայ յիշել Ռուսիոյ արտաքին գործոց նախարարութեան բանբեր Զախարովայի յայտարարութիւնը

Արցախի հիմնահարցի կարգաւորման գործընթացին Անգարան մասնակից դարձնելու հաւանականութիւնը չբացառող, թէկուզ խիստ պայմանական:

Այս հանգրուանին նման հարցերու տարողունակութիւն չ'ունենար հանդիպման օրակարգը: Ռուսիոյ կողմէ Թուրքիոյ տնտեսական ապաշրջափակումը կ'ըլլայ այս հանդիպման առաջնային արդիւնքներէն մէկը: Երկու կողմերն ալ կը գիտակցին, որ դժուար կացութեան մէջ յայտնուած ըլլալն է իրենց մօտ մերձեցման շարժառիթը, եւ երկու երկիրները, մեկնելով բազմաթիւ հանգամանքներէ, չեն կրնար երկարատեւ կտրուածքով համադրել իրենց զինուորաքաղաքական գործունէութիւններու սլաքները: Իսկ ասիկա ոչ միայն Սուրիոյ պարագային:

«Ա.»

WWW.ARMENIANPRELACYKW.COM

ԱԿՆԱՐԿ

Միրտա Ժողովուրդիս, Միտքս Արարատին. Յո՞ Երթաս Հայաստան

17 Յուլիսն էլ վեր Արարատի գագաթին կուտակուած են գորշ ամպեր: Անոնք սակայն մայր բնութեան գործած եղանակային հոլովոյթին չեն պատկանիր, այլ լերան հանդիպակաց ապրող ժողովուրդի մը ստեղծած *քառասուն փոփոխ* մը հետեւանք են:

Արուեստական եւ անհեռանկար վիճակ, որուն պատճառով ազգ մը ամբողջ պիտի երգէ *իրկարայի երգը*, եթէ երբեք չաթափի իր խելայեղութենէն, ապիկար, ատելավառ ու անհանդուրժող տրամադրութենէն եւ անտեղի ծայրայեղութենէն:

Ի դէպ, չենք ուզեր ընդհանրացնել մատնանշումը, ոչ ալ՝ մասնաւորել, զայն վերագրելով խմբակի կամ շրջանակի մը, այլ՝ առկայ գոյամիճակին ահաւորութիւնն ու աննախատեսելի կացութեան լրջութեան ահագանգել:

Այսինքն՝ պատահածին մասին յախուռն կեցում՝ ծք արտայայտել, ըսելի՛ք ունենալ, զգացական զեղումներէ եւ կարգախօսներէ ձեռքազատ՝ սեփական ժողովուրդին ներկայանալ ճակատաբաց եւ վճռական:

Ինչո՞ւ:

Որովհետեւ շիկացած ու ատելավառ պայմաններու մէջ, պետական մակարդակի գործուած բազում սխալներու եւ շահագործումներու ճնշող առօրեայի մը դէմ յանդիման, արդար ցասումով յագեցած ժողովուրդի մը պոռթկումին եւ շահագործող օտար կողմերու ընծայած առիթներու *խաչմերուկին*, նորաստեղծ պետականութեան հիմքն է, որ պիտի սասանի, հայ իրականութիւնը մասնատուի, անմեղ արեան հեղեղ թափի եւ հայրենիքը քանդուի:

Տեսնել է պէտք, թէ այսօր ինչպիսի՞ բարբարոսութիւններու թատերաբեմ են դարձած մօտիկ թէ հեռակայ երկիրներ ու մայրաքաղաքներ:

Միւս կողմէ, յիշեցնել է պէտք ամէն քայլափոխի, որ ենք ազգ մը, որ ունի աւելի քան հինգ հազարամեայ պատմութիւն, եզակի մշակոյթ, հարուստ լեզու եւ ապրելու-գոյատեւելու հրաշալի կազմաւորում եւ իր տեղն ու դերը ունի համաշխարհային քաղաքակրթական համակարգին մէջ:

Այլապէս ալ ենք ժողովուրդ մը, որուն սիրտը հայութիւն կը բաբախէ, հայօրէն կը շնչէ ու կը ստեղծագործէ, երբ ան կը գտնուի ճգնաժամի եւ կամ օրհասի կիզակէտին:

Այո՛, հակասութիւններով եւ քմայքներով պսպղուն ազգ մըն ենք:

Եւ սակայն, այս ժողովուրդը, հակառակ իր ստացած դարաւոր վերքերուն եւ տառապանքներուն, չի յանձնուիր թաքուն թէ բացայայտ ուժերու, չի թուլնար հրէշային ծրագիրներու դիմաց, կը տոկայ անասելի ու դժոխային պայմաններու մէջ, կ'ապրի յանուն վաղուան օրուան, անընդմէջ կ'արարէ, ունի իւրայատուկ հոգեկերտուածք, երազներու աշխարհ, հեքիաթներու պաշար, մտային խորախորհուրդ տարածքներու երանգներ, սակայն անոր կը պակսին *հաւաքական ինքնադէկլարման մշակոյթ, պետականութեան հաստատման եւ քաղաքական մտքի հասունացման լայնածիր հորիզոններ*:

Այո՛, հորիզոններ, որոնք մեզ պիտի սնուցեին ճանչնալու անցեալը, ապրելու ներկան եւ տեսնելու ապագան: Մա է, ըստ իս, ամէնէն հրամայական խնդիրը մեր ազգին առջեւ ցցուած եւ մեծագոյն մարտահրաւերը, որմէ պատուով պետք է դուրս գալ, անպայման՝:

Իսկ հայութեան յառաջդիմութեան, բարգաւաճումին, անվտանգ ապրելու, բարօրութեամբ յագենալու եւ պետականութիւն պահպանելու մեծագոյն խոչընդոտը իր թշնամին՝ զազիր թրքութիւնն է եղած դարեր շարունակ, եւ անոր այսօր միացած է արիւնաբքու ազերին:

Տարբերելով այլ ազգերու ընդհանուր վիճակէն, հայութիւնը ունի երկու գերխնդիր՝ Հայաստանի հզօրացումն ու Արցախի պահպանումն ու բարգաւաճումը, այդ հողամասին վրայ ապրող հայութեան տիրութիւն ընելու հրամայականն ու արեամբ ազատագրուած տարածքներու պաշտպանութիւնը:

Սակայն, նորանկախ Հայաստանի պետականութիւնը կը տառապի ներքին անորակելի ախտերէ, համատարած փտածութենէ, ընկերային անարդարութենէ, տնտեսական ահռելի կացութենէ, հոյլ մը օլիկարխ մակարոյծներէ, որոնք սեփական ժողովուրդի մը շալակին բռնացած՝ օրն ի բուն կը կեղեքեն առանց դոյզն խպնանքի եւ խղճահարութեան:

Եւ տակաւ խորացող ժողովրդական մակարդակի ցաւերուն, տառապանքին եւ ընդհանուր բարոյալքութեան ի տես հայ պետականութեան ներսիդին կ'արիւնտտի արտագաղթի ահաւոր տարողութեան պատճառով, որուն պատասխանատուութիւնը նոյնինքն պետութիւնը կը կրէ անվերապահօրէն:

Դեռ ամիսներ առաջ էր, ապրիլի առաջին օրերուն, թուրք-ազերի զագրութիւնը կը համարձակէր խախտել ամէն համաձայնութիւն եւ յարձակիլ հայոց բանակին վրայ կատարելու նոր սպանդներ: Սակայն ճիշդ ատենին հայութիւնը սթափեցաւ եւ ոգու արիութեամբ նետուեցաւ մարտի դաշտ, տուաւ անզին զոհեր, կորսնցուց որոշակի տարածք, սակայն փրկեց հայրենիքն ու ժողովուրդը:

Ի տես ստեղծուած ահաւոր կացութեան, հայութիւնը համախմբուեցաւ իր պետականութեան եւ բանակին շուրջ եւ յայտնեց իր պատրաստակամութիւնը՝ պաշտպանելու իր ներկան ու ապագան: Թէեւ նման գոյավիճակի մէջ ի յայտ եկան պետական մակարդակի այնպիսի խաղքութիւններ, վատոզի վերաբերումներ, բացթողումներ եւ անըմբռնելի թերութիւններ, որոնց դէմ յանդիման հայութիւնը ընդվզած յայտնեց իր բուն բողոքն ու ցասումը, այդուհանդերձ պետական այրեր ու կառոյցներ մնացին կրաւորական դիրքէ խօսողներ՝ հրաժարելով հաշուետուութիւն կատարելէ:

Այո՛, մեր ժողովուրդը ցոյց տուաւ հայավայել ընդվզում եւ ցասում, յանուն հայոց պետականութեան, բանակին եւ հայրենիքի պաշտպանութեան:

Քիչ անդին, ազերիական յարձակումէն հարիւր օրեր ետք, հայութիւնը կը դիմագրաւէր նոր կացութիւն: Եւ ահա, շաբաթ մը ի վեր հայոց մայրաքաղաքի սրտին մէջ մենք ականատես կ'ըլլանք հայօրէն դատապարտելի զինեալ յարձակումի մը, այդ ալ ոստիկանական կեղքոնի մը դէմ: Յարձակողները՝ արցախեան գոյամարտի բովէն անցած տղաներ են: Տեղի կ'ունենայ հրացանաձգութիւն, կը սպաննուի հայ սպայ մը. պատանդներ եւ պահանջներ, ազգային տարակուսանք, հարցադրումներ, քաղաքական ամլութիւն, անորոշութիւն եւ բանակցային գործընթացներ:

Իսկ յաջորդող քանի մը օրերուն, ցոյցեր, բողոքի երթեր, բախումներ եւ ձերբակալութիւններ: Հայ ոստիկանութեան դէմ աժան հերոսութիւններու պատկերներ:

Անմիջապէս լրատուամիջոցներու օգտագործում եւ անմիջական հարցադրումներու տարափ, շուտութեամբ լեցուն խօսքեր եւ յաւակնոտ դիպաշարերու յորդորներ:

Աւելի՛ն. հայաշունչ գաղութներու մէջ թեր եւ դէմ տեսակէտներ, կեցուածքներ եւ անպայման դիրքորոշուելու հրաւերներ: Արդ, ստեղծուած այս ահաւոր կացութեան մէջ մեզմէ ո՞վ կը համարձակի այսօր իր հայեացքները ուղղել հայոց սրբազան լեռան արեւեր գագաթին, առանց ամօթի խարանք իր ճակտին:

Մեզմէ ո՞վ կրնայ այսօր իր խժժացող ձայնը բարձրացնել ու հայրենիք երգել Եռաբլուրի խորախորհուրդ պանթէոնին դիմաց:

Մեզմէ ո՞վ բաւարար քաջութիւնը ունի նայելու այրիացած հայ մօր, որբուկին ու ծերունիին աչքերուն, առանց խղճմտանքի ցաւի եւ յանցանքի զգացումի:

Մեզմէ ո՞վ իրաւունքը ունի հայ նորահաս սերունդներէն յափշտակելու մեր դարերու երազանքին կիզակէտը՝ հայոց պետականութիւնը:

Միւս կողմէ, ի՛նչն է պահանջուածը, անսալ տղայական ձայներու ու այսպէս ասած երիտասարդական անհեռանկար խանդավառութիւններու, որպէսզի կոչուինք հայրենասէրներ, թէ կուրացած հոգիով ծափահարել զինեալ բռնութիւններու, որպէսզի փաստենք մեր մարտունակութիւնն ու քաջութիւնը:

Ո՛ր ողջմիտ երիտասարդը ինքնիրեն իրաւունք կու տայ իր եղբօր՝ հայ ոստիկանը ապտակելու, անոր տարագը անարգելու, արժանապատուութիւնը խոցելու, վիրաւորելու եւ խոշտանգելու:

Հայութիւնը իր քաղաքական մտքի հասունութեամբ եւ առկայ վտանգի լոյսին տակ միա՛յն կրնայ դատապարտել զինեալ բռնութիւնը, բիրտ ուժով քաղաքական պահանջներ ներկայացնելը, փողոցի տրամաբանութեան որդեգրումն ու իշխանութիւն տապալելու ձեւին, եղանակին ու միջոցին մէջ խտրութիւն չդնելու անխոհեմ վարքագիծը:

Արարատասէր հայը ճակատաբաց եւ առանց երկմտանքի կրնայ յայտարարել ու պահանջել հայ իշխանաւորներուն գործած տարբեր ոճիրներու հաշուետուութիւնն ու հրաժարականը, օգտագործելով սահմանադրական բոլոր տիպի իրաւունքներն ու միջոցները: Էականը՝ յամառ կեցուածք, հայաշունչ մօտեցում եւ խիզախ գործելակերպի որդեգրումն է, ոչ թէ ինքնագլուխ եւ խուժան տրամաբանութիւնը:

Միւս կողմէ, իւելամիտ հայ մարդն ու երիտասարդը կրնայ անհունօրէն ողջունել հասարակական ամէն շարժում, որ ունի ազգային մտասուեռում, յստակ քաղաքական կողմնորոշում եւ հայրենակերտ աշխարհահայեացք:

Հայաստանը հայուն սրբութիւնն է, եւ վերջ:

ՀԱՄԲԻԿ ՊԻԼԱԼԵԱՆ

www.yerakouyn.com

ԼՈՒՐԵՐ ԳՍԴՈՒԹՆԵՐԷՆ

Ս. Թադէի Եռօրեայ Ուխտագնացութիւնը



Նախաձեռնութեամբ Ատրպատականի հայոց թեմի Ազգային վարչութեան, 62-րդ տարին ըլլալով, 14-16 Յուլիսին տեղի ունեցաւ տարեկան եռօրեայ ուխտագնացութիւնը դէպի Արտազի Ս. Թադէու առաքեալի վանքը՝ հովանաւորութեամբ Մեծի Տանն Կիլիկիոյ Արամ Ա. կաթողիկոսի եւ նախագահութեամբ Ատրպատականի հայոց թեմի առաջնորդ Գրիգոր եպս. Չիֆթճեանի:

14 Յուլիսի երեկոյեան Գրիգոր եպս. Չիֆթճեան ժամանեց վանք, ուր արժանացաւ ժողովրդային դիմաւորութեան՝ օրհնելով հացն ու աղը: Իսկ տաճարին մէջ ան իր առաջին պատգամը յղեց ուխտաւոր բազմութեան: Ապա տեղի ունեցաւ երեկոյեան ժամերգութիւն:



15 Յուլիսի Ս. Թադէի վանքի արեւմտեան շրջափակին մէջ, կազմակերպութեամբ Թաւրիզի Հայ համալսարանականներու միութեան վարչութեան, տեղի ունեցաւ երիտասարդական խանդավառ յայտագիր՝ երգերու, նուագներու եւ ասմունքներու կատարումով:


16 Յուլիսին Ս. Թադէի տաճարին մէջ մատուցուեցաւ Ս. պատարագ, որուն ընթացքին կարդացուեցաւ Արամ Ա. կաթողիկոսի օրհնութեան գիրը՝ ուղղուած համայն իրանահայութեան, յատկապէս՝ Ատրպատականի հայոց թեմի ժողովուրդին եւ ուխտաւոր հաւատացեալներուն: Այնուհետեւ առաջնորդ սրբազանը իր քարոզին մէջ խաղաղութիւն խնդրեց Աստուծմէ՝ հաստատելով, որ աշխարհի մէջ խաղաղութեան վերահաստատման միակ աղբիւրը Քրիստոսն է:

Աւարտին, առաջնորդ սրբազանը բարձր գնահատեց բոլոր այն անհատները, որոնք տարեկան ուխտագնացութեան կազմակերպման աշխատանքներուն իրենց նպաստը կը բերեն: Անդրադառնալով Արամ Ա. կաթողիկոսին կողմէ 2016 տարին «Ծառայութեան տարի» հռչակուած ըլլալուն եւ հետեւելով վեհափառ հայրապետին թելադրութեան՝ գնահատելու թեմի կեանքէն ներս երկար վաստակ ունեցող ծառայողները, առանձնացուց Վանքերու ուխտագնացութեան յանձնախումբէն 6 անձեր, որոնք անցնող 25 տարիներուն ընթացքին իրենց նպաստը բերած էին ուխտագնացութիւններու կազմակերպման աշխատանքին, վեր առնելով անոնց երկար տարիներու նուիրեալ աշխատանքը:

Լիզպոնի 5-ին Նուիրուած Յիշատակի Ձեռնարկ

17 Յուլիսին Պոսթընի Ուաթըրթաուն շրջանի Սուրբ Ստեփանոս եկեղեցոյ մէջ նշուեցաւ Լիզպոնի տղոց յիշատակը, որոնք 33 տարիներ առաջ նահատակուեցան Հայ դատի եւ արդարութեան ու պահանջատիրութեան ճամբուն վրայ:

Հոգեհանգստեան արարողութենէն ետք եկեղեցոյ սրահին մէջ տեղի ունեցաւ ձեռնարկ: Բարի գալուստի խօսքը արտասանեց Ճաշ Թեվէքէլեան, որ հրաւիրեց օրուան պատգամաբեր «Հայրենիք»-ի եւ անոր անգլերէն բաժինի՝ «Արմինիըն Ուիքլի»-ի յօդուածագիր Ռուբէն Ճանպագեանը:



Ճանպագեան նկատել տուաւ, որ 33 տարիներ ետք Լիզպոնի հինգին պատգամը տակաւին վառ կը մնայ բոլորին միտքերուն եւ հոգիներուն մէջ, հաստատելով, որ անոնց յիշատակին կազմակերպուած այս հաւաքը առիթ մըն է վերանորոգուելու անոնցմէ մեզի հասած կտակով եւ վերահաստատելու, որ նոր սերունդները եւս պիտի շարունակեն պահանջատիրական ուղին:



Ձեռնարկի աւարտին եկեղեցոյ հովիւ Անդրանիկ Ա. քինյ. Պալճեան խօսք առնելով՝ յայտնեց, որ այս հինգ հերոսներուն կատարածը անարդարութեան դէմ յուսախաբ մարդու արդար ցատումն էր, որ նոր ուժ տուաւ հայ ժողովուրդին եւ նոր հորիզոններ բացաւ Հայ դատի երկար ճամբուն վրայ:

Արեւելեան Ամերիկայի Եւ Քանատայի Առաջնորդներու Այցելութիւնը



15 Յուլիսին թեմի առաջնորդ Մուշեղ արք. Մարտիրոսեան Ազգ. առաջնորդարանին մէջ ընդունեց այցելութիւնը Միացեալ Նահանգներու Արեւելեան թեմի առաջնորդ Օշական արք. Զօլոյեանի եւ Քանատայի թեմի նորընտիր առաջնորդ Բարգէն արք. Չարեանի, որոնք հիւրաբար կը գտնուին Արեւմտեան թեմ:

Առաջնորդ սրբազանը անգամ մը եւս շնորհաւորեց Բարգէն արք. Չարեանը Քանատայի թեմի առաջնորդ ընտրուելուն առիթով եւ յաջողութիւն մաղթեց անոր եկեղեցաշէն ու ժողովրդանուէր առաքելութեան:

Հանդիպումը առիթ եղավ խորհրդակցելու երեք թեմերը յուզող հարցերուն եւ ծրագիրներուն մասին: Քննարկուեցան միացեալ հրատարակութիւններու, ինչպէս նաեւ՝ Արամ Ա. կաթողիկոսի յառաջիկայ այցելութեան վերաբերող ծրագիրները:

Արամ Ա. վեհափառը, իր ընտրութեան եւ օժան 20-րդ տարեդարձին առիթով, յառաջիկայ աշնան պիտի այցելէ նշեալ երեք թեմերը: Ան 30 սեպտեմբերէն 4 հոկտեմբեր պիտի գտնուի Միացեալ Նահանգներու Արեւմտեան թեմի հաւատացեալներուն ու ժողովականութեան հետ, ապա պիտի այցելէ Քանատայի եւ Միացեալ Նահանգներու Արեւելեան թեմերը:

Վերականգնելու Սկսած Են Ախալքալաքի ԿումպուրտոԳիւղի Եկեղեցին



Երկու շաբաթէն աւելի է, որ սկսած են Կումպուրտո գիւղի Ս. Համբարձման եկեղեցւոյ վերանորոգման աշխատանքները: Այժմ եկեղեցւոյ տարածքը կը մաքրուի, հողային աշխատանքներու ժամանակ մարդկային ոսկորներ դուրս կու գան: Այս մասին գրած է «Ջաւախք նիուզ»-ը:

Ախալքալաքի Կումպուրտո (վրաց. Քումուրտո) գիւղի Ս. Համբարձման եկեղեցին կառուցուած է 10-րդ դարուն: Այսօր եկեղեցին կիսաւեր վիճակի մէջ կը գտնուի:

Յուլիս 5-էն սկսեալ եկեղեցւոյ տարածքին կ'ընթանան հողային մաքրման, ինչպէս նաեւ եկեղեցւոյ տարածքի տապանաքարերու, խաչքարերու, հիմնաքարերու դասակարգման աշխատանքներ:

«Հիմա մաքրման աշխատանքներ կ'իրականացուին, քարերը արդէն դասաւորած ենք, հողը պետք է հաւասարեցնել: Այս աշխատանքներէն ետք հնագիտական պեղումներ կ'իրականացուին, որմէ ետք պիտի սկսին վերականգնման աշխատանքները», ըսած է հնագէտ, վերականգնող Բեսիկ Կոլբայեանը:

Յայտնենք, որ Կումպուրտոյի 10-րդ դարու տաճարի վերականգնման ծրագիրը կ'իրականացնէ Վրաստանի մշակութային ժառանգութեան պահպանման գործակալութիւնը: Եկեղեցւոյ հիմնովին վերականգնումը պիտի տեւէ 3 տարի: Եկեղեցւոյ քարերը յատուկ պիտի բերուին Աբուլ գիւղի քարհանքէն: Յատուկ ուսումնասիրութիւն կայացուած եւ յստակացած է, որ եկեղեցին կառուցուած է նոյն քարերով:

Անցեալ տարի Վրաստանի Մշակութային ժառանգութեան պահպանման գործակալութիւնը որոշակի պեղումներ կատարած էր, որուն պատճառով գիւղացիները կը դժգոհէին: Եկեղեցւոյ հիւսիսային մասին մէջ հողային շերտի հեռացման աշխատանքներու ժամանակ աշխատակիցները արկղներով մարդկային ոսկորներ հաւաքած են:

Հաղորդենք, որ Կումպուրտոյի եկեղեցին Վրաստանի մէջ հայկական վիճայարոյց եկեղեցիներու ցանկին մաս կը կազմէ:

www.tragir.am

ԱՅԼԱԶԱՆ

Ճուլիէթ Գալստեան



Վերջերս Հայաստան այցելեցին սփիւռքահայ օփերայի երեք երգչուհիներ՝ Ճուլիէթ Գալստեանը, Հրաչուհի Բասենցին եւ Վարդուհի Խաչատրեանը: Անոնք սփիւռքի նախարարին կողմէ պարգևատրուեցան «Կոմիտաս» մետալով եւ պատուոյ գիրերով:

Այսօրուան սինակով ծանօթանանք Ճուլիէթ Գալստեանին, որ ժընեւի երաժշտանոցի ձայնամարզութեան

փրոֆեսոր է, ինչպէս նաեւ՝ միջազգային մրցոյթներու դափնեկիր:

Ահա թէ ինչպէ՛ս կը ներկայացնէ ինքզինք օփերայի երգչուհին:

«Օնաճ եմ Երեւան, այնպիսի ընտանիքի մը մէջ, որ տասնամեակներ շարունակ օփերայի նշանաւոր երգիչներ, երաժիշտներ եւ պալէի յայտնի պարողներ տուած է աշխարհին: Հայրս՝ Վիլեն Գալստեանը, հայկական պալէի դպրոցի հիմնադիր, յայտնի պալէ պարող եղած է: Դաշնամուրին զուգահեռ, երգեցողութիւն սորված եմ տատիկէս՝ Սարիանա Յարութիւնեանէն:

«Երաժշտանոցը աւարտելէ ետք մասնակցած եմ շատ մը մրցոյթներու եւ գրաւած առաջին, երկրորդ մրցանակային տեղեր: Իտալիոյ Վերչելլի քաղաքի Վիոթթի մրցոյթին առաջին մրցանակ ստանալէ ետք իտալական մամուլը զիս կնքեց «Վիոթթի թագուհի» անունով:

«Երգած եմ հեղինակաւոր օփերայի դահլիճներու մէջ, շատ յայտնի երգիչներու հետ պատիւ ունեցած եմ ըլլալու նոյն բեմին վրայ եւ երգած՝ անոնց հետ: Մարմնաւորած եմ համաշխարհային օփերաներու բազմաթիւ կերպարներ, համագործակցած եմ Եւրոպայի եւ Ռուսիոյ առաջնակարգ սիմֆոնիք նուագախումբերու հետ, աշխատած եմ մեծահամբաւ խմբավարներու հետ:

«Երջանիկ եմ իմ աշխարհիս մէջ, իմ աշխատանքովս: Այսօր ալ կը շարունակեմ երգել աշխարհի բոլոր բեմերուն վրայ: Շուտով Նորվեկիա պիտի մեկնիմ, Պըրկըն քաղաքին մէջ երգելու Վերտիի «Նապուքօ» օփերան, որմէ ետք երկու համերգ ունիմ Զուիցերիոյ մէջ:

«Մեծ պատիւ է ինձի համար հայրենիքիս մէջ պարգևատրուիլը: Քսան տարիէ կ'երգեմ, երգը իմ կենսակերպս է, իմ երակներուս մէջէն հոսող արիւնը, առանց որուն՝ չեմ պատկերացներ կեանքս:

«Մենք մեր երկրի դեսպաններն ենք դուրսը. մեր երգով, մեր ներկայանալի բարձր արուեստով աշխարհին կ'ըսենք, թէ ո՛վ է հայը»:

www.aztarar.com